



“BAN LUCHA P’E” T’E MENSAHE CU YEGA DEN FESTIVAL DI TUMBA



Jerino “Bass” Ridderstap cu su banda DLS a bay cu e maximo titulo di Festival di Tumba su di 49 edicion. Un festival cu a conoce hopi reto y cu na final a conta cu solamente 9 participante.

Practicamente pa 1’or di madrugada e resultado tabata conoci: Jerino, Rey di Tumba 2020.

Jerino mes a confesa cu e tabata hopi nervioso y por a mira esaki tambe riba escenario. “Mi no tabata e Jerino di semper, mi no a actua cu mi cancion y mi a concentra mas riba letranan di mi cancion,” el a bisa na final.

E cancion aki: “Ban lucha p’e” (refiriendo n’e mensahe pa lucha pa Festival di Tumba sigui existi, ta algo cu e mester a presenta e añaki. El a conta cu aunke el a inscribi, e no tabata di bay participa mas. Pero si el a compone un Tumba pa Eduard van der Biezen. “Esaki tabata prome biaha cu mi a compone un Tumba completamente mi so.” E areglo tabata den man di Michi Bosman.

Lamentablemente, Eduard van der Biezen a bira malo diaranson. Un dia prome cu e festival, el a hay’e di participa tog. E tema ta relaciona cu e situacion cu Tumba ta pasando aden awor, a haci cu e no ta un cantica cu por warda pa otro año. No por a laga otro cantante bay cun’e, pasobra inscripcion a cera. E mensahe cu mi tabata kier a trece, e yega cerca e publico, “Ban Lucha p’e.”